



3. august 2016

UKA 2016/136

Inatsisartut Suleriaasianni § 33, imm. 1 naapertorlugu Inatsisartuni aalajangiiffigisassatut siunnersuut imaattoq matumuuna saqqummiuppara:

**Borgmesterit borgmesteritut atuunnermik saniatigut aallaavittut allamik suliffeqarsinnaanerannik suliffimmilluunniit ingerlatsisinnaanerannik pisinnaajunnaartitsisumik, Naalakkersuisut kingusinnerpaamik UKA 2017-imi kommunit aqunneqarnerat pillugu Inatsisartut inatsisaanut allannguutissatut siunnersuummik saqqummiussinissamik peqquneqarnissaannik Inatsisartuni aalajangiiffigisassatut siunnersuut.**

(Inatsisartunut ilaasorta q Ane Hansen, Inuit Ataqatigiit)

### **Tungavilersuut:**

Naalakkersuisut siulittaasuat Naalakkersuisunilu ilaasortat allat tungaviumik atuuffittut qinigaanermik saniatigut suliffimmik inuussutissarsiummilluunniit allamik ingerlatsisinnaangillat. Tamanna aamma Inatsisartut siulittaasuannut atuuppoq<sup>1</sup>.

Soqutigisat aporaassinnaanerannut aarlerinaammik killiliinissaq tamatumunnga tunuliaqutaavoq, tassunga ilanngullugu inuttut soqutigisat atuuffimmik ingerlatsinermut sunnuteqarsinnaanerannut aarlerinaateqarneq pissutigalugu, ilaatigullu atuuffimmik isumaginninnerup piffissaq tamakkerlugu isumaginninnissaq tamakkiisumillu aallussillunilu tunniusimanissamik qulakkeerumaneqarluni.

Malittarisassalli taamaattut borgmesteritsinnut atortinneqangillat.

Kommunit kattussuunneqarneranni borgmesterit akisussaaffiat suliassaallu siusinnerusumut sanilliullugu annertuumik annertuseriarput, ullumikkullu borgmesteriuneq ulloq naallugu atuuffittut naatsorsuunneqartariaqarpoq. Tamanna borgmesterit akissarsiaasa annertussusaat pillugu malittarisassani naatsorsuunneqarpoq<sup>2</sup>. Kommunalbestyrelsillu taamaalillutik borgmesterit ukiumut 918.000 kr-it angullugit akissaasersinnaavaat.

Taamaammat aamma borgmesterivut pillugit aalajangersakkanik, borgmesterit piffissaminnik atuuffimminnik suliffimminnillu allamik suliffeqarfiutiminnilluunniit piffissamik avitsinatik,

---

<sup>1</sup> Malittarisassat tasunga tungasut Inatsisartut Naalakkersuisullu pillugit Inatsisartut inatsisaanni kapitali 5-imi takuneqarsinnaapput.

<sup>2</sup> Borgmesterinik borgmesterillu tulliinik kiisalu kommunalbestyrelsinit nunaqarfinnilu aqutsisunut ilaasortanik aamma najukkani ataatsimiititaliat ilaasortaannut il.il. akissarsiaqartitsineq pillugu Namminersorlutik Oqartussat nalunaarutaat nr. 25, 30. december 2013-imeersoq

piffissaq tamakkerlugu atuuffimminnik isumaginninnissaanik qulakkeerinnittunik atuutilertitsinissaq naapertuuppoq.

Tamanna tunuliaqutaralugu malittarisassanik aallaavittut borgmesterit, borgmesteriunermik saniatigut allamik suliffeqarsinnaanerannut suliffimilluunniit ingerlatsisinnaanerannik pisinnaajunnaartitsisumik, kommunit aqunneqarnerat pillugu Inatsisartut inatsisaata<sup>3</sup> allangortinneqarnissaanik siunnersuummik Naalakkersuisut saqqummiussinissamik peqquneqarnissaat siunnersuutigaara.

**Siunnersuutip Aningaasatigut allaffissornikkullu pisortanut kinguneqaatissai:**

Inatsisissatut siunnersuutip suliarineqarneranut isumalluutit immikkoortinneqartussatut ilimagineqartut, nutserineq, tusarniaaneq inatsisissamillu teknikikkut misissuineq ilanngullugit, ukiup affaanik atorfeqartitsinermut aningaasartuutinit annerussanngitsut ilimagineqarpoq.

**Namminersorlutik inuussutissarsiortunut aningaasatigut allaffissornikkullu kinguneqaatissai:**

Soqanngilaq

**Inunnut ataasiakkaanut aningaasatigut allaffissornikkullu kinguneqaatissai:**

Soqanngilaq

---

**3**

Kommunit aqunneqarnerat pillugu Inatsisartut inatsisaat nr. 22, 18. november 2010-meersoq, Inatsisartut inatsisaat nr. 6, 29. November 2013-imeersukkut allangortinneqartoq.